

tanga, i runga i te tohutohu a te taha turaki ka whakaarotia tona tono e ratou ina tu ratou hei kawanatanga ka rere ia ki te taha turaki kawanatanga ka hinga taua kawanatanga o Hall. Kaore pea i tae ki te rua wiki e tu ana taua kawanatanga nei ka hinga. Kaati koirā te rongo nui o tera kawanatanga ara ko te poto o tona tuunga, i runga i te mahi a taua kaumatua ona pai me ona he ano; i runga i te rika kia whai mana ia ki te whakahaere i nga whenua o te iwi e pokea kinotia nei e te pakeha me nga apiha kawanatanga o era nga ra-Otira i kite ia i te tahangoi o tona ahua ki roto i tera whare, koia ka titoa nei e ia tenei waiata:—

*Tenei ka noho i te Paremata
Parara ki te uru nga whare o Kuini.
Nga whare tenei e mahia atu nei
Nga ture kihino mo te iwi maori na!*

*E noho nga iwi i runga rangi totohu
Ka maewa noa ra i runga rangi kekewha.
Nga waka uru mate mo te iwi maori na!*

*Ko Taiaroa ra te hetu o nga mema.
Nana te motini mo te motu katoa.
He aroha noake nga iwi o te motu
I tu mai ai e a Te Mohi Tawhai
Te mema o Ngapuhi e rapu nei te oranga e!*

*Kumea mai ra te pooti kia piri,
Hei ngaki i te mate mo te iwi maori.
Piki ake matou ko aku hoa ki runga,
He whakaaro kotahi piri tonu matou.
I hokona ki te moni ka hinga nei matou na.*

*Tera koutou kei te tuku kahiti
Ki te tumuaki e nga kooti whenua.
Ka noho i reira ko nga kai-tawari.
Ko te mea tera hei huna atu e
I te mana nui tonu o te iwi maori na!*

*Tenei ra e te iwi ko te mate i o mema.
Ko turi ko whango e ko pohe i aku whatu,
Huri kaurapa noa te tinana i te whare,
Tu tahanga noa te marae o te pakanga,
Ko te kapetautanga te arero i roto ra e!*

*Ehara a Kerei i te hoa piri pono,
Mo te iwi maori e kimi nei te oranga
Na ana nei hoki ra ka raru te Ati Awa.
I mau ai a Te Whiti i runga o Taranaki
Na ana nei hoki ra ko te pire reiti,
Ko te tiuiti e, ko te hetu o Kuini na!*